

### HEADLINES (MORNING)

1. Larsap General (Retd) Vijay Kumar Singh-a'n Mizo thalaite chu Indian Armed Forces zawm tura theihna leh chakna an ngah zia hria a, Mizoram atanga Indian Armed Forces mi leh sa hmingthate hnungzui ve turin a chah.
2. Lai Autonomous District Council (LADC) hnuai Member of District Council inthlan neih zawh taka vote tla te chhiar turin inbuatsaihna kalpui mek a ni a, vote hi naktukah chhiar a ni ang.
3. Prime Minister Narendra Modia chuan Vikas Bhi, Virasat Bhi-a tunlai changkanna leh khawpui tih changtlunna chuan hnam ziarang a ti bo loa a thumchak thung a ni a ti
4. Vawiin Lok Sabha inkhawmah national song Vande Mataram kum 150 na pualin special discussion neih a ni dawn

<><><>

### ARMED FORCES FLAG DAY

Larsap General (Retd) Vijay Kumar Singh-a'n Mizo thalaite chu Indian Armed Forces zawm tura theihna leh chakna an ngah zia hria a, Mizoram atanga Indian Armed Forces mi leh sa hmingthate hnungzui ve turin a chah.

Armed Forces Flag Day, 2025 puala thuchah a sawinaah, Larsap chuan nimin Armed Forces Flag Day, kumtina December ni 7-a hman thin chu ram chhan nana nunna hlu tak hlantute, ram inpumkhatna vawngchim tura ramri depa huaisen taka beitu leh la bei chhonzawm zel tur sipaite zahna lantirna ni a nih angin, Mizorama Ex-Servicemen zawng zawngte chibai bukin ram tana an hnathawh avanga a lawm thu a sawi a. Larsap chuan Indian Armed Forces te chu ram leilung, tuipui leh van boruakte ngawrh taka venghimitute an ni a, an thawhrimna zarah mipuite ralmuang takin an awm thei a ni a ti a. Indian Armed Forces mi leh sa Mizoramin a chherchhuah tha tak tak, State leh India tihmingthatute zingah Lt Col Clement Lalhmingthanga (Retired) leh Petty Officer TBC Lalvenchhunga te chu 9th Legislative Assembly of Mizoram-a member ni lai mek an ni tih sawiin, Mizoram fa hrin Captain Lalrinawma Sailo, 4th Para (Special Forces) chuan kumin August 15 khan sipai huaisen chawimawina Kirti Chakra a dawng chu chhuanawm a tih thu a sawi a, Mizoram thalaite chu Mizo mi chhuanawm leh hmingtha takte entawna infuih thar nan hmang tur leh, Indian Armed Forces zawm tura theihna leh chakna an ngah zia hre thar turin a chah a ni.

Larsap chuan Sawrkar kum kalta leh kal mekah Mizoram sawrkar chuan indona avanga boral leh hliampui tuar chungte hnenah Cheng nuai sawm leh panga a sem chhuak tawh tih sawiin, Ex-Servicemen leh an chungkua, an vaiin 23 - damlohna avanga inenkawl ngai 16 leh khuarel chhiatna tawk 7 - te hnenah tanpuina Cheng singkua sangkhat leh zanga sem ral a nih thu a sawi bawk a ni.

<><><>

### SPECIAL TRAIN

Tunhnaia Indigo thlawhtheihna engemawzat khaihlak avanga khualzin tam takin harsatna an tawh tihziaawm nan Northeast Frontier Railway chuan Sairang leh Guwahati inkara tlan rel-ah coach pahnih a dah belh.

Northeast Frontier Railway chuan tunhnaia khualzin phur thlawhtheihna thlawk tur tam tak khaihlak avanga khualzin an pun avangin Inrinni kalta atang khan Guwahati-Sairang Express-ah coach pahnih AC leh Sleeper a dah belh a, vawiin December ni 7 atangin Sairang - Guwahati Express ah coach pahnih AC leh Sleeper dah belh lehin heng coach an dah belh te hi dah belh hlen tur nilovin khualzinte tana a remchan zawkna tura an dah lailawk a nih thu an sawi a.

Hei bakah hian AC 3 Tier coach pahnih, Sleeper class coach 10 leh GSLR coach 2, a vaiin coach 14 awmna Special train chu tunkar Ningani khian Nagaland khawpui pakhat Dimapur atanga Sairang thleng tlan tir a ni dawn a, a tuk, December ni 12, Zirtawpni khian Sairang atanga Guwahati thleng tlan tir a ni bawk dawn a ni.

NFR thuneitute chuan he an ruahmanna siam hian khualzinte an ngaihpaawimawh zia a lantir bakah Thlasik laiin hmarchhak state hrang hrang Mizoram, Assam, Meghalaya, leh Nagaland-ah te khualzin an pun chhoh avangin coach leh special train an dah belhna hian tualchhung mite leh a tlawhtute tan hlawkna a thlen ngei an rin thu an sawi a ni.

<><><>

## **LADC COUNTING**

Lai Autonomous District Council (LADC) hnuai Member of District Council inthlan neih zawh taka vote tla te chhiar turin inbuatsaihna kalpui mek a ni a, vote hi naktukah chhiar a ni ang.

Nimin khan Lawngtlai DC Conference Hall-ah vote chhiar tur te an training a, he hun hmanpuitu, District Election Officer Pu Donny Lalruatsanga chuan harsatna awm lova vote thlak an zo fel chu lawmawm a tih thu sawiin inthlanna felfai a awm theih nana pui tu MPF leh tlawmngai pawl te thawhrimna chu chhuanawm atih thu a sawi a ni.

DEO chuan Lungtian -II, a Polling Officer-boral ta Pu Israel MS Dawngliana chungchang sawiin sawrkar atanga ralna a dawn theih nan theihtawp chhuah a ni a ti a. Vote chhiarah fimkhur a tul hle tih sawiin buaina awm lo turin Counting Official te chu tha taka inzir turin a chah a ni.

LADC inthlanah hian vote za zela 83.99% tla in vote tla te hi naktuk Thawhlehni hian Govt. Lawngtlai College-ah zing dar 8 atangin chhiar a ni ang.

<><><>

## **END**

Mizoram sorkar, kohhran leh tlawmngai pawlte'n ruihhlo do beihpui an thlak mek karah kumin hian kum 21 hnua ruihhlo vanga thi an tam ber tum a thleng.

Excise & Narcotics Department in a chhinchhiah danin, kumin January thla atanga tun thla December ni 2 thleng khan Mizoramah ruihhlo avangin mipa 69 leh hmeichhia 14, an vaiin mi 83 an thi tawh a, kum 21 chhunga ruihhlo vanga thi an tam ber tum niin, ruihhlo vanga thi te hi thalai kum 17 atanga kum 57 inkar te an ni a, an zinga mi 33 te chu Heroin vanga thi an ni a, midang 47 te chu heroin leh ruihhlo dang tihpawlh vanga thi an ni thung a, midang pathum chu alprazolam, damdawi mum leh damdawi dang vanga thi te an ni.

Excise & Narcotics Department in Mizorama ruihhlo vanga thi a chhinchhiah tan kum 1984 atanga kumin thlengin Mizoramah ruihhlo vangin mi 1962 an thi tawh a, heng zinga mi 1722 te chu mipa niin, 240 te chu hmeichhia an ni a, ruihhlo vanga thi tawh zingah kum 14 mi chu a naupang ber a, kum 58 chu a upa ber thung a ni.

Kum 2004 kha Mizorama ruihhlo vanga thi an tam ber tum niin mi 143, mipa 122 leh hmeichhia 21 an thi a, khatih hunlai khan Proxyvon chu an thihpui tam ber a ni a, kum 2015 chho atangin ruihhlo vanga thi zingah Heroin vanga thi an tam tan a. Kum 2004 hnulamah kumin 2025 hi ruihhlo vanga thi an tam leh ber tum a ni a, Excise & Narcotics Department in Ruihhlo vanga thi a chhinchhiah zingah hian zu vanga thi an tel lo a ni.

<><><>

## **MAMIT DISTRICT CHRISTMAS PREPARATION**

Mamit District ah Krismas leh kumthar lawm turin mipuite chu an inbuatsaih cho mek a, Kohhran thenkhat chu Inrinni khan Krismas inbuatsaihna atan thingphurin an hnatlang.

Mamit District ah hian Krismas ruaithehna tur lengkhawm thingpui lum nan tunhma atangin Nu leh pa, nula leh tlangval leh naupang ten a huhovin ramhnuaiah Krismas thing an phur thin a, Inrinni kalta khan Mamit district chhunga Kohhran thenkhat chuan Krismas pual hian hnatlangin thir an phur a, Kohhran dangte pawhin hmalak chhoh zel an tum bawk.

**Hun inherdanglam zelah Khawpui lamah eirawngbawl nan gas an hman nasat tawh vangin krisman thingphurh hi an nei ngai tawhlo a, thingtlang lamah chuan eirawngbawl na gas a harsat avang leh thingtuah tur ala tam avangin Krismas**



## **LAWNGTLAI DISTRICT NGO**

Lawngtlai District NGO Coordination Committee chuan Inrinni khan LADC inthlanpui neih zawh taka Candidate te ko khawmin, LADC a Sorkar thar siam turah Sorkar ngeInghet leh rintlak din an duh thu an sawi.

Lawngtlai District NGO Coordination Committee Chairman, Pu F. Lalrothanga chuan, LADC ah Party mala Sorkar emaw thawhdunna leh thawhhona atanga Sorkar siam emaw pawh ni se, mipui ten sorkar nghelngnet an mamawh tih a sawi a. Tupawh tling se candidate te chu ram leh mipui dinhmun ngun taka thlir chung a rorelna kalpui turin a ngen a ni.

Lawngtlai District NGO Co Ordination Committee chuan, LADC a Sorkar indin dan emaw Sorkar kaldanah emaw mipui mit tikham zawnga chetna a awm a nih chuan theihtawpa an dodal tur thu an sawi bawk.



## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.



## **INTERNATIONAL DAY OF PERSONS WITH DISABILITIES**

Rualbanlote huapzo khawtlang a din theih nan mithiam ten puipunna hmunah Rualbanlote an tel ve theihna tur ruahmanna tha zawk siam a tul thu an sawi.

Akashvani Aizawlin ‘Rualbanlote huapzo khawtlang din’ tih thupui hmanga Social Welfare Department-a consultant Pu Lallianzuala, Mizoram Disability People Organization President Pu C Lallianzama leh SELCO Foundation State Head, Pu Lalnunluanga Colney te a kawmnaah rualbanlote ngaih pawimawh an tulna hrang hrang an tarlang a, vohbik te chu puipunna hmunah an tel ve theihna kawng awlsam zawk ruahman anih theih nan hmalak a tul thu sawiin an dinhmun thlir thiana ngaihsaktu an mamawh tih an sawi a.

Department hotute chuan Mizo mipui nawlpuiin rualbanlote lainatna leh hmangaihna chang an hre chho zel tih sawiin rualbanlote tel ve theihna khawtlang din tur chuan an chhehvela awm te an pawimawh a ti a, rualbanlote'n mahni inkiltawihna an neih loh nan leh mahni inrintawkna an neih ve theih nan ngaihsakna an lantir a tul thu sawiin YMA leh khawtlanga inhrilh tam a pawimawh an ti a, chhiatni thatnia puipunna hmun, inkhawm leh thutkhawm pawimawh a awmin ke a kal thei lo rualbanlote tel ve theihna elevator awm building Mizoramah a vang hle tih sawiin thuneituten hmasawna ruhrel din kawngah rualbanlo te tana awlsam zawka an tel ve theihna tur ruahman a tul tih sawiin rualbanlo ngaihsak tu ten tanpuina pek bakah an nitin nuna an hman tangkai zel theihna tura zirtir leh dawmkan a pawimawh hle tih an sawi bawk a ni.



## **EAM**

External Affairs Minister Dr.S.Jaishankar chu Japan Forum, New Delhi a neihah a tel. Social Media ah he thu hi tarlangin Pu Jaishankara chuan khawvel kalphung thar insiam chho mek chungchangte an sawiho thu leh India-Japan thawhdunna chungchang an sawiho tih a tarlang a ni.



## **PM**

Prime Minister Narendra Modia chuan ramin a thil tum hmasawna leh hnam rohlu vawngghim kalkawp tir Vikas Bhi, Virasat Bhi hmanga tunlai changkanna leh khawpui tih changtlunna chuan hnam ziarang a ti bo loa a thuamchak thung a ni a ti. Nimina UNESCO Inter-governmental Committee for Safeguarding of the Intangible Cultural Heritage New Delhi-a neih a hawnaah he thu hi sawiin Pu Modia chuan India chuan hnam ziarang, tihdanphung leh chibil tumah ramchhungah hlamchhiah an awm lo a ti a. UNESCO chuan khawvel pumah hnam hrang hrangte tihdan leh ziarang venhim kawngah an thawk tha hle tih a sawi bawk a ni. He programme hi Red Fort ah tun thla ni 13 thlang hman a ni ang.



## LOK SABHA

Vawiin Lok Sabha inkhawmah national song Vande Mataram kum 150 na pualin special discussion neih a ni dawn a. Sawrkar thuchhuah danin Prime Minister Narendra Modia chuan sawihona hi bul a tan ang a. Hemi pual hian darkar 10 hun ruahman a ni a. Parliamentary Affairs Minister Kiren Rijju chuan chhun dar 12 ataning sawihona hi tan a ni dawn a. Hei bakah hian naktukah Electoral reforms chungchang Lok Sabha ah sawiho a ni baw k ang. Lok Sabha Speaker Om Birla hoa all party meeting ah special discussion neih hi rel a ni a. Sawrkar chuan Political Party tin hruaitute chu Parliament rorel tuang taka kaltir turin a ngen a ni.

<><><>